

Ciet Vwnzva Betyaem Bouxcuengh Yunghningz:

Dujva Gyaеundei Yisuz Ndawbiengz Minzczuz

邕宁壮族八音文化旅游节：民族民间艺术的一朵奇葩

□ Cwag Giaz iagj Sinbyungz boiz



▲ Ngoenzneix sim' angq raeuh, diuq foux youh ciengq go.



▲ Buzva soengq fuk daengz, gvaengh neix vuenyungz raeuh.



▲ Mehmbwk boq betyaem, sing caemh sep rwenzred.



▲ Saefouh caen maenh' ak, gag ndaek youh gag boq.

Betyaem boq nauh hoengh, leuxloh doengz sing ciengq, yienfwngz diuq foux angq, haenhdanq saedceij ndei. Moix bi bet nyied bet, seiqlengq hek daengz caez, Dahbetic ngoenz-neix, vuenheij ciet betyaem…… Doengh bi neix daeuj, ciet lijyouz vwnzva betyaem Bouxcuengh Yunghningz aeu betyaem guh cawjsienq, vih gyoengq bouxhek ndaw guk rog guk yienj le ciengz hei q yisuz ndawbiengz minzczuz ndei yawj ndeu.

Youq ngoenzciet vwnzva betyaem Bouxcuengh, vunzraeuz ndaej yawj cien vunz nauh betyaem 《Betyaem Sing Hap Angqyangz Daengz》、cawjdaez vwnzva Beiguih 《Loq Raen Byadingjsae》、fwen dangdieg 《Hai, Leuxloh》 daengj gij biujyienj miz daegsaek minzczuz neix; bae diuzgai daeng' va yawjgonz gij daeng' va gak cungj gak yiengh gig miz daegsaek haenx; bae gwnzgai cimz makhojlungz daengj gijgwn haekfeih baenz gwn haenx……Ciuq gaisau, betyaem Bouxcuengh Yunghningz dwg youz loxlez hung, loxlez iq, aendig haj cong, laz, gyong, ca, gyongndaek Bouxcuengh daengj gyoebbaenz, “betyaem” yaemsak ndei dingq, sepset, rwenzred, hawj vunz ndawsim saenqdoengh, gyoengq nungzminz cungj gyaез dingq maij yawj, youq ranghdieg Yunghningz mingzdaeuz hung dangqmaz, dwg aen sukingj cungj guh' angq youh boq youh roq fungsug minzczuz ndawbiengz dieg Bouxcuengh

Guengjsae raeuz. Betyaem Bouxcuengh Yunghningz lizsij gyaenanz, ndaej gangj daj Ciuhcienh satbyai couh miz. Seizhaenx, rangh dieg Bujmyau Nazlu, lajmbanj miz vunz aeu bawx haq lwg, ranz moq guh baenz, coux hek daih hek daengj hozdung angq hoh seiz, daihgya cungj cingj “ban betyaem” daeuj boq nauh, ndigah, betyaem Bouxcuengh couh hwnghoengh dangqmaz. Gvaqlaeng, betyaem Bouxcuengh Yunghningz youq gwnz giekdaej miz boqboq roqroq daegsaek fungsug minzczuz caeuq Bouxcuengh raeuz le, caiq gyasou gij ndei yinhyoz Guengjdoeng dem, ciemhciemh hwnghat baenz “betyaem Bouxcuengh Yunghningz” gig miz daegsaek Bouxcuengh raeuz haenx, caemhcai youq ranghdieg gyangqlangh ciengxlwenx hwnghat riuz, caprag ndawbiengz laeglili. Youq yenzdan, ndwencieng, “sam nyied sam”, betnyied cibngux, gozging daengj ngoenzciet angq hoh geizgan, doih betyaem nungzminz cungj bae gak aen mbanj biujyienj hawj nungzminz yawj. Seizneix, doih betyaem Bouxcuengh dieg Yunghningz miz aeu mbanj guh danhvei, caemh miz aeu yanghcin guh danhvei gyoebbaenz, youq Bujmyau, Nazraeuz, Sinhgyangh, Cunghhoz daengj yanghcin, moix aen cunh cungj miz geij aen doih betyaem, bae miz vunz heuh couh bae biujyienj, dan Yunghningz Gih boux rox boq betyaem haenx couh miz 300 lai vunz.

Doengh bi neix daeuj, Yunghningz Gih cwnghu fuj caeuq vwnzva bumwnz haenqrengz vatgud, baujhu, swnjcienz, haifat betyaem Bouxcuengh, daj 2005 nienz gvaq-daeuj moix bi cungj banh baez ngoenzciet yisuz vwnzva betyaem Bouxcuengh ndeu, lij bued ngaenz guh gij hong baujhu betyaem Bouxcuengh, laebbanh aenban betyaem Bouxcuengh bouxcoz lwgnyez, beizyangj boux caixhangz boq betyaem. “Betyaem Bouxcuengh Yunghningz” 2005 nienz ndaej Cunghsenh Bu, Vwnzva Bu soengq hawj aen cwnghauh “daengx guk senhcien duenzdae biujyienj vwnzyi”, 2007 nienz ndaej Swcigih Yinzminz Cwnghu fuj lied haeuj buk daih' it swcigih gaep feihvuzciz vwnzva yizcanj baujhu mingzloeg, bineix 6 nyied 19 hauh, Aen Hezvei Vwnzyi-gyah Ndawbiengz Cungguk fat aen cwnghauh “mbanjranz vwnzva betyaem” hawj Yunghningz Gih.

Doengh bi neix daeuj, aendoih betyaem Bouxcuengh Yunghningz gonqlaeng camgya swcigih laebbaenz 40 hopbi, 50 hopbi, ciet fwen go daengxbiengz Guengjsae, ciet yisuz fwen go daengxbiengz Namzningz, Cungguk – Dunchmungz Bozlanjvei, ciet vwnzva lijyouz daengxbiengz Baekging, Cezgyangh Hangzcouh Sihhuz Bozlanjvei, Gyanghsuh Vuzsiz Bozlanjvei daengj doengh gij hozdung biujyienj angq hoh hung neix, mingzdaeuz riuz doh ndaw gih rog gih.



▲ Fouxvaizcin ndei yawj, dauqcawq nyi hemq ndei.



▲ Duzlungz saeceij daeuj goenghoh, mbanjranz hohhoh cungj vuenyungz.



▲ Yienj fungsug minzczuz, yienh huzndei vuenyungz.



▲ Ngoenzciet vunz daengz lai, gwnzgai caenx ndaetfwd.



▲ Seiz yietnaiq doxcam, cienz betyaem fanhdaih.



▲ Maxceij cet gvaq gai, vunzlai dem fukfaenh.